

歐遊做「阿四」玩得唔夠喉

備戰廣州個唱

鍾嘉欣全面復出

■鍾嘉欣想踩過界做主持及演舞台劇。

鍾嘉欣2015年下嫁醫生老公後移居加拿大，專心相夫教子，逐漸淡出幕前，只偶爾為無綫拍劇或回港出席商演。昨日她出席活動時透露忙於為8月的廣州演唱會作準備，更宣布結婚後休息至今，決定全面復出！

鍾嘉欣昨日到尖沙咀出席保險活動，她表示剛與家人完成約一個月的歐洲之旅，終於有機會獨自返港工作，她說：「真係要多謝老爺同奶奶，因為老爺80大壽，奶奶特登用咗成年Plan行程，完成咗老爺嘅生日願望，一齊坐郵輪旅行。」不過她坦言最初很擔心3個小朋友未必適應長時間旅行，結果她與老公整個旅程都做「阿四」，更笑言要去多一次旅行放鬆才夠。她開心稱遊覽了很多名勝景點，但最吸引她的地方竟是當地街市！鍾嘉欣笑言成為母親後很喜歡行街市：「我俾當地嘅街市大開眼界，好大好多顏色，啲糖果乜嘢形狀都有，睇到我嘩、嘩、嘩、嗌出嚟！」

希望舉行世界巡唱

她表示去完旅行後增磅不少，自己也不敢上磅，故

要努力操肌。提到她在社交網上載健身短片，網民讚她腹肌強勁，她笑言只是陰影，現時要加緊練歌：「雖然8月會喺廣州開騷，但去旅行冇理由自己匿埋練歌。」她坦言今次不會帶小朋友去廣州：「佢哋寫咗卡畀我，叫我加油，我應承佢哋今次會做到最好，到下次佢哋睇，一定會睇到媽咪好勁。」

鍾嘉欣坦言等了多年才有機會開演唱會，有點感觸：「由結婚開始有啲傷心，傷心唔係因為結婚，係我突然消失，作為粉絲嘅偶像突然走咗，佢哋會唔開心，所以我上番台唱歌。（回歸樂壇？）係全線回歸，乜都得，主持、舞台劇、電影、奸角、打女，幻想就會變成真實。」她希望能到各地舉行巡唱，並強調香港站是她必然之選。



■鍾嘉欣勤力操肌備戰演唱會。



■子女逐漸長大，鍾嘉欣安心復出。

姚子羚尋回「失散姊妹」

不少網民指日本女子舞蹈團AVANTGARDEY成員Nona跟姚子羚撞樣，早前Nona出席活動時，當記者遞上姚子羚的照片給她看時，她即說：「可以同咁靚嘅女仔似樣好開心！」Nona還稱很想與子羚一齊跳舞，希望她能夠來睇騷。前晚AVANTGARDEY在亞博開騷，子羚真的有捧場，還到後台跟Nona合照。兩人似失散姊妹久別重逢，又齊齊扮鬼臉，十分搞笑。事後子羚在社交網上載照片及留言：「好開心見到Nona，她真的很可愛……Nona還follow了我，太感動了！」



■姚子羚（左）與Nona一齊扮鬼臉。



■林峯Chok爆影宣傳海報。

林峯邀「城寨兄弟」睇騷

林峯將於9月在澳門倫敦人舉行《LOVE FLOWS 林峯澳門演唱會》。過往的演唱會，林峯分別以「水」、「火」、「光」、「時間」等不同元素作主題，今次將會以「風」帶出全新視聽享受，他說：「我覺得風似無形但又有『型』，可以令整個舞台上嘅創作更加無界限，我哋可以用『風』展現相關嘅舞台效果同埋畫面，從視覺效果震撼每一位入場觀眾。」憑電影《九龍城寨之圍城》登上演藝事業新高峰的他，預告會邀請片中兄弟越洋睇騷。

李慧詩主持奧運兼顧多 李麗珊睇好港隊爭牌

三代奧運獎牌得主李麗珊、李慧詩、蘇慧音與一眾香港運動員昨日出席HOY TV《巴黎奧運2024》開廠拜神儀式。繼上屆東京奧運中國香港隊於劍擊、游泳及乒乓球有好成績，李麗珊繼續睇好今屆港隊可以爭牌。李麗珊做過奧運主持，問到會否分享經驗給後輩？她表示李慧詩也做過亞運會，讚對方做得好不用教：「其實我有特別專長，都係抱住運動員心態去幫運動員抒發心入面想講嘅嘢，因為有啲運動員比較怕醜。」

提到李慧詩於上屆亞運會評述時失言，她承認講錯說話，已作出檢討：「每人都會有自己支持嘅人，希望做香港主持，都支持中國隊同中國香港隊。上次我做單車賽車旁述，今次真正做主持，要做到全方位兼顧更多，上次係臨時講咗自己唔認識嘅嘢，有錯誤希望改善到。」



■左起：蘇慧音、李麗珊、李慧詩為HOY TV主持奧運節目。